



東華三院  
Tung Wah Group of Hospitals

140  
TWGHs 140th Anniversary  
東華三院一百四十周年

東華三院越峰成長中心

峰訊

第十七期

2011年3月



小板家  
出沒注意

# 前言

近年在本地如雨後春筍般出現的毒品小拆家，他們對身邊客（青少年為主）及社會所做成的傷害，甚為嚴重，他們利用青少年朋輩的影響力，以速遞方式將各式各樣的毒品送至青少年手上，他們更愛以「免費試食」作招徠，利用身邊朋輩的好奇心，引誘他們嘗試毒品，對方上癮後，便要長期依賴小拆家「入貨」。不過事實上，不少小拆家本身也是吸毒者，同樣有需要接受輔導服務。

對青少年工作者而言，若能了解小拆家的心態及他們對朋輩的影響，會有助於處理與毒品有關的服務，包括預防或介入層面。本期峰訊為大家拆解小拆家的心態及對現象作分析，讓讀者對他們有較深入的了解。

另外，向您們宣佈一個喜訊：東華三院越峰成長中心已於10月在上環開設多一間濫用精神藥物者輔導中心（中西南及離島服務處），詳情請見內頁。



## 「拆在90後」 - 毒品小拆家訪問

今年20歲的阿傑，外表健碩、性格開朗、有禮貌、一個看似與一般人無異的年青人，處於一個不平凡的少年時代。阿傑15歲開始吸毒，更在17歲開始販賣毒品，是一名毒品「小拆家」，最後因為藏毒罪被判勞教中心服刑，出獄後立志重過新生活，現在地盤做工程學徒。

傑：阿傑（化名） - 小拆家

葉：葉文駿 - 社工

葉：阿傑，你是怎樣開始做毒品拆家？

傑：我以前是hi嘢嘅，k仔、fing頭、可樂（可卡因）全部都試過，有時買多一啲，仲可以計平啲，例如1克k仔要\$100，但1骨（約8克）只係要\$500，有時買咗又食唔晒，扔咗又好咗，留喺身上又怕俾警察拉，淨低嘅毒品就賣俾朋友，有時仲可以賺返個本，變咗免費hi嘢，慢慢就習慣咗咁樣買嘢（毒品）。



葉：原來買毒品都好似超市一樣「買得多平得多」，你當時有意識到自己在販毒嗎？

傑：無啱，只係不知不覺咁就賣咗毒品，有時仲覺得自己幫緊朋友，因為有啲朋友唔識拆家，唔容易擺貨，幫佢地「駁腳」只係舉手之勞，有時為咗「溝女」，就會喺士高免費請啲女仔食，嗰時以為自己好威，依家覺得自己好幼稚。

葉：毒品是怎樣交收的？

傑：要睇場合，如果喺公眾場所，就會去後樓梯、公廁等地方，有時仲會收藏喺私家車入面，因為私家車會安全啲，如果喺一啲娛樂場所，例如的士高，會喺後樓梯，甚至枱面交收。不過，我都係避免將毒品擺喺身上。

葉：點解呢？

傑：(被捕) 風險太高喇，嗰時我會避免毒品經自己手，我只係做聯絡，其他嘅(高危) 嘢交俾我啲「嚟仔」(下屬) 做，**其實販毒好難做，太低調毒品無人買，太高調好快俾警察拉。**

葉：你有試過咩驚險場面？

傑：最深刻係俾警察拉嗰一次，有個朋友約我喺後樓梯擺貨，5分鐘後我到達，一推門周圍已經有警察包圍我，又搵我落地，當時我知道我已經玩完，我四周圍望，我要搵吓我個朋友喺邊，我搵極都搵唔到，我就懷疑係我朋友出賣我，係佢叫我出嚟俾貨佢，只有佢知道我身上有貨，點解會有咁多差人？我真係估唔到佢會咁做，我真係好嬲！！

最後我判咗入沙咀勞教中心，我喺裡面見到好多同我年紀差唔多嘅人，佢地都係因為販毒而判入嚟呢度，我哋有幾個共通點：第一，我哋都覺得自己係全世界最小心嘅拆家，被拉嘅只會係其他拆家，唔會係自己；第二，我哋都會將責任歸咎喺出賣自己嗰個人身上，認為錯在人哋做「二五仔」，唔係自己販毒。但有趣嘅係，我被拉之後心情竟然比以前平靜，因為以前過著提心吊膽嘅日子，每日都活喺恐懼之中，擔心被捕，講電話吞吞吐吐係因為驚被警察「鈎線」，食飯坐車要周圍望係因為擔心被跟蹤，最嚴重嘅係，我對朋友失去信心，講任何嘢都有保留，因為**任何人都可以出賣自己。**拆家令我嘅世界好孤單，喺勞教中心身體雖然喺度受苦，但內心反而輕鬆咗好多，因為無需再恐懼。



# 學者解碼

近年有進行本港毒品小拆家研究的前香港浸會大學社會工作系助理教授 梁麗儀博士指出，毒品小拆家的出現，令更多青少年吸毒，因為小拆家於大陸帶毒品至香港後，會儘快於青少年活動地帶「散貨」，他們除將毒品速遞至用家家中外，並會在自己的朋輩群體中不斷開發市場，青少年朋輩互相影響下，對毒品的戒心減低，出現你試我又試的吸毒次文化，令青少年吸毒情況愈來愈嚴重。



梁博士認為，小拆家透過販賣毒品，所得的利潤很高，其他行業薪金實在難以比擬，而且當拆家不需要學歷、技倆，只需在自己熟悉的朋輩群體、日常活動場合內，便可散貨，工作無難度，自然不願意改行。




梁博士道：「一般小拆家起初會天真地以為被拘捕的機會不大」，他們往往會自以為自己是全世界最小心的拆家，永遠以為「唔會輪到我，我唔會俾人拉！」；不過，正如個案中的阿傑，從事小拆家一段時間後，眼見身邊不少拆家朋友一個又一個入獄，他們的內心會開始不安，缺乏安全感，但不做拆家的話，他們又會諗：「咁我可以做乜？」諗諗下，又會好自然繼續販賣毒品，到被捕時才自我檢討，但出獄後若繼續和以前的朋輩為伴，容易再次販毒，形成惡性循環，情況坎坷！

對於小拆家賣毒品給朋友，會否內疚？梁博士指出，小拆家對此一般不會自責，他們會覺得：「就算我不賣，其他人都會賣俾班friend啦！」所以當**發現有小拆家在朋友群出現，當然要速速走人啦！**

至於如何減少小拆家的影響，梁博士建議可從毒品供應方面著手，警方應大力阻截毒品流入本港，包括在海關加強巡查，以減少小拆家的貨源。





『我搵夠就收手㗎啦！』



『就算我唔賣，其他人都會賣俾班friend啦！』



『人哋俾人拉係因為佢哋  
唔醒目或者唔好彩啫！』

『唔會輸到我，  
我唔會俾人拉！』

『唔做呢行，咁我可以做乜？』



『就算捉到我都唔會有事！』



# 小拆家的迷思

迷思1： 如果俾人捉到我拆嘢，最多咪話我請朋友食囉，頂多咪告我藏有！

解迷1：《危險藥物條例》(香港法例 第134章)作出規定，管制任何人士經營、藏有、進口、出口、供應和製造有關嘅危險藥物，法庭會根據案件嘅環境證供同疑犯嘅犯罪意圖作為考慮。所以，只要係有意圖提供毒品俾其他人，**就算無收錢，都有機會被檢控**，最高刑罰係終身監禁同罰款五百萬元！

迷思2： 我賣A(假)貨俾人，捉到我都唔會有事！

解迷2：邊個話無事？根據《危險藥物條例》(香港法例 第134章)第4A條-「販運看來是危險藥物的物質」，販運或者提出販運睇落去似係危險藥物嘅物質，而表示所賣嘅係毒品，**即使最終證實並非毒品，亦屬違法**。一經定罪，最高可罰款五十萬元同監禁七年。

迷思3： 我搵夠就收手喇啦！

解迷3：好多人人都係咁講，又有幾多個真係可以全身而退呢？一來，人嘅貪念係永無止境，越係搵得多，就越想搵多啲。二來，人在江湖身不由己，越踩越深嘅同時，亦都越涉及更多嘅人事、利益關係同埋更多犯罪證據，到時想返轉頭就更難啦！而且，根據《販毒(追討得益)條例》(第405章)授權當局追查、沒收和追討販毒得益，**就算你賺到幾多，最終都係一無所有！**


迷思4： 人哋俾人拉係因為佢哋唔醒目或者唔好彩啫！

解迷4：就算你有幾醒目、有幾小心，你都控制唔到你啲客/Friends小唔小心，佢哋隨時有機會俾人跟(被警方跟蹤調查)。你亦有機會俾人督灰(告發)，尤其係你啲行家會唔抵得你，或者有啲客未必想你再引誘佢吸毒而報串，亦都可能係你認識嘅人爆響口，一啲都話唔埋。同時間，警方大力打擊，間中又會聽到佢哋派臥底查案，所以**被人拉唔係醒唔醒目或者好唔好彩，只係遲早嘅問題啫！**



# 戒毒輔導熱線：2884 1234

東華三院越峰成長中心 - 中西南及離島服務處正式啟用了，為市民提供一站式預防及戒毒輔導服務。此外，東區及灣仔服務處之運作將一如以往，照常為市民提供戒毒服務。



## 中心開放時間：

開放時間	一	二	三	四	五	六
9am-1pm						✓
2pm-6pm	✓	✓	✓	✓	✓	
6pm-10pm		✓	✓	✓	✓	

可與中心社工預約於非辦公時間進行面談或小組服務

電話：2884 0282

電郵：csdcross@tungwah.org.hk


傳真：2884 3262

網址：<http://crosscentre.tungwahcsd.org>

# 東華三院越峰成長中心

中西南及離島服務處：香港上環禧利街二號東寧大廈1501-1504室

東區及灣仔服務處：香港筲箕灣寶文街六號東華三院方樹泉社會服務大樓九樓



戒毒輔導熱線：2884 1234

電話：2884 0282 傳真：2884 3262 網址：<http://crosscentre.tungwahcsd.org> 電郵：[csdcross@tungwah.org.hk](mailto:csdcross@tungwah.org.hk)

督印人：鍾燕婷 籌委：葉文駿、麥錦儀、曾宏強、梁洪偉

印刷數量：1500份 印刷日期：2011年3月